



Broj: 05-854-7/21
Sarajevo, 28.04.2021. godine

Na osnovu člana 23. stav (1) tačka d) Zakona o Agenciji za bankarstvo Federacije BiH („Službene novine Federacije BiH“, broj: 75/17), člana 16. stav (1) tačka n) i t) Statuta Agencije za bankarstvo Federacije BiH („Službene novine Federacije BiH“, broj: 3/18), člana 64. stav (1) tačka b), člana 70. st. (1), (3) i (6) Zakona o javnim nabavkama („Službeni glasnik BiH“, broj: 39/14), člana 8. stav (2) tačka d) Pravilnika o uspostavljanju i radu Komisije za nabavke („Službeni glasnik BiH“, broj: 103/14), a na osnovu preporuka komisije za provođenje postupka javne nabavke softverskog osiguranja Microsoft licence iz Zapisnika o pregledu i ocjeni ponuda broj: 05-854-6/21 od 27.04.2021. godine, direktor Agencije za bankarstvo Federacije BiH donosi

ODLUKU **o izboru najpovoljnijeg ponuđača u postupku nabavke roba**

Član 1.

Prihvataju se preporuke Komisije za provođenje postupka javne nabavke softverskog osiguranja Microsoft licence za potrebe Agencije za bankarstvo Federacije BiH iz Zapisnika o pregledu i ocjeni ponuda broj: 05-854-6/21 od 27.04.2021. godine i okvirni sporazum dodjeljuje se ponuđaču „MIBO KOMUNIKACIJE“ d.o.o. Sarajevo.

Član 2.

Ukupna vrijednost okvirnog sporazuma iz tačke I. ove Odluke utvrđuje se u iznosu od 101.573,00 KM bez poreza na dodanu vrijednost (PDV), što sa uračunatim PDV-om iznosi 118.840,41 KM.

Član 3.

Po okončanju roka za žalbu, ugovorni organ će sa izabranim ponuđačem iz Člana 1. ove odluke zaključiti okvirni sporazum na period od jedne godine, kojim će regulisati međusobna prava i obaveze.

Član 4.

Ova odluka bit će objavljena na internet stranici Agencije za bankarstvo Federacije BiH (www.fba.ba), istovremeno sa upućivanjem iste ponuđačima koji su sudjelovali u postupku javne nabavke, u skladu sa odredbama člana 70. stav (6) i člana 71. stav (2) Zakona o javnim nabavkama.

Član 5.

Za izvršenje ove odluke zadužuje se i ovlašćuje Sektor zajedničkih funkcija.

Član 6.

Ova odluka stupa na snagu danom donošenja.

O B R A Z L O Ž E N J E

Odlukom o pokretanju postupka javne nabavke uredskog materijala i sitnog inventara, broj: 05-854/21 od 08.03.2021. godine odobreno je provođenje postupka javne nabavke predmetne robe za potrebe ugovornog organa. Javna nabavka provedena je putem otvorenog postupka, a kao kriterij za izbor

najpovoljnije ponude odabrana je najniža cijena tehnički prihvatljive ponude. U skladu sa članom 35. Zakona o javnim nabavkama, Obavještenje o nabavci broj: 3010-1-1-47-3-23/21 objavljeno je na Portalu javnih nabavki (ejn.gov.ba) dana 09.03.2021. godine i u Službenom glasniku BiH, broj: 17/21 dana 19.03.2021. godine. Procijenjena vrijednost javne nabavke utvrđena je u ukupnom iznosu od 101.573,55 KM, bez poreza na dodanu vrijednost (PDV).

U skladu sa Rješenjem ugovornog organa broj: 05-854-2/21 od 02.04.2021. godine imenovana je Komisija za provođenje postupka javne nabavke softverskog osiguranja Microsoft licence za potrebe Agencije za bankarstvo Federacije BiH (u daljem tekstu: Komisija), kojom su definisane njene nadležnosti, koje uključuju poslove otvaranja, pregleda i ocjene ponuda, te davanje preporuke za odabir najpovoljnije ponude.

Slijedom navedenog, Komisija je u okviru svojih nadležnosti i ovlaštenja provela predmetni postupak nabavke, te o tome sačinila Zapisnik o pregledu i ocjeni ponuda u kojem je konstatovano da su po predmetnom postupku nabavke pravovremeno pristigle 2 (dvije) ponude. Na osnovu izvršene analize i ocjene pristiglih ponuda u pogledu utvrđivanja njihove prihvatljivosti u odnosu na kvalifikacijske uslove utvrđene u tenderskoj dokumentaciji, Komisija je utvrdila:

- da je ponuda ponuđača „MIBO KOMUNIKACIJE“ d.o.o. Sarajevo kvalifikovana i prihvatljiva, te da su dostavljeni svi traženi dokazi propisani tenderskom dokumentacijom, na propisan način;

- da se ponuda ponuđača Konzorcij „SYS Company“ d.o.o. Sarajevo i „Emado“ d.o.o. Sarajevo odbacuje na osnovu člana 68. stav (1) i stav (4) tačka i) Zakona o javnim nabavkama, odnosno navedeni ponuđač nije ispunio minimalne uslove za kvalifikaciju navedene u:

- poglavlju 3. - Uslovi za kvalifikaciju ponuđača, tačka 1.3 (Ekonomska i finansijska sposobnost – član 47. Zakona o javnim nabavkama) tenderske dokumentacije, tako što je dostavio potvrdu izdatu od strane „Raiffeisen Bank“ d.d. Sarajevo broj: 01179/21 od dana 30.03.2021. godine s navodima da je u navedenoj banci imalac transakcijskog računa, koji je ujedno i glavni račun, koji u periodu od 29.03.2020. godine do 29.03.2021. godine nije bio blokiran, niti je ponuđač imao zabranu raspolaganja sredstvima na transakcijskom računu, što je u suprotnosti sa zadanim uslovom tenderske dokumentacije, kojim je traženo da je ponuđač dužan dostaviti „izvještaj o svima otvorenim računima pravnog lica koji izdaje Centralna banka BiH. Navedeni izvještaj ne smije biti stariji od datuma objave Obavještenja za predmetnu nabavku. Uz navedeni izvještaj, ponuđač je dužan dostaviti Potvrdu izdatu od strane Banke u kojoj je otvoren „Glavni račun“, sa naznakom od strane Banke da navedeni račun ponuđača – „Glavni račun“ nije bio blokiran u zadnjih 12 (dvanaest) mjeseci računajući od datuma objave Obavještenja o nabavci“ – 09.03.2021. godine.

U postupku donošenja ove odluke posebno su cijenjene činjenice da je Komisija, pravilno i potpuno, izvršila ocjenu kvalifikovanosti navedenog ponuđača te pregled i ocjenu ponuda, u skladu s kriterijima iz tenderske dokumentacije.

U postupku ocjene provedenog postupka, ocijenjeno je da je Komisija u svemu pravilno postupila te da je izbor najpovoljnijeg ponuđača izvršen u skladu sa Zakonom o javnim nabavkama, podzakonskim aktima i tenderskom dokumentacijom.

Uvidom u priloženu dokumentaciju vidljivo je da je ponuđač „MIBO KOMUNIKACIJE“ d.o.o. Sarajevo najbolje ocijenjen na osnovu zadanih kvalifikacijskih i cjenovnih uslova nadmetanja, pa je Komisija dala preporuke da se istom, saglasno članu 69. stav (1) tačka a) Zakona o javnim nabavkama, dodijeli okvirni sporazum u predmetnom postupku javne nabavke roba.

Uvažavajući sve navedeno, primjenom člana 64. stav (1) tačka b) i 70. st. (1), (3) i (6) Zakona o javnim nabavkama i člana 8. stav (2) tačka d) Pravilnika o uspostavljanju i radu Komisije za nabavke, odlučeno je kao u dispozitivu ove odluke.



POUKA O PRAVNOM LIJEKU:

Protiv ove odluke može se izjaviti žalba Ugovornom organu – Agenciji za bankarstvo Federacije BiH, najkasnije u roku od 10 (deset) dana od dana prijema ove odluke, saglasno članu 97. i 101. Zakona o javnim nabavkama.

Žalba se izjavljuje Uredu za razmatranje žalbi/Kancelariji za razmatranje žalbi – Filijala/Podružnica Mostar, putem ugovornog organa, u pisanoj formi, direktno ili preporučenom poštanskom pošiljkom. Žalba se podnosi u najmanje 3 (tri) primjerka.


DIREKTOR
Jasmin Mahmužić



Dostaviti:

1. Ponudjačima u postupku
2. a.a.

